

四明叢書

張宗祥



梅讀存稿附錄卷三

贈遺詩文

近知文旆之京強搆鄙歌一首用陳數年交愛
之情以壯萬里雲霄之志伏希笑覽斤正幸幸
長空八月風力高羣鳥養羞爭葺巢此時鴻鵠偏得意
扶搖直上凌雲霄功名有若楊氏子壯懷正與鴻鵠比
桃華浪煖姑不行亦俟秋風奮然起秋月皎皎秋日晴
蓼紅蘋白連洲汀山中黍熟得新釀一壺持送登蓬瀛
沙頭不忍分襟別握手臨風情最切飛黃蟾蜍固有之

強搆愚辭陳略節我昔同門忝知舊盟言並效功成就
何期不肖早歸田寂寂柴門掩清書幾回謾憶楊與趙
二子昂藏出人表但知才貌無妍色詎料升騰有遲早
趙郎已見魚化龍君今志氣如長虹胸襟特達抱經濟
此行必遂謀爲同蟾宮擬折丹桂枝讀書不負寒窗時
佇聽金殿拜恩寵綠袍換錦聲名馳雙親堂上已垂白
祿俸分將養朝夕臣子職分宜兩全永作家邦後人則
予雖忝在平生契亦望音書早傳遞不圖拔茅連茹私
恐免相思遠繫繫

鄰溪張琳稿奉

鴛鴦篇奉寄復之楊先生閣下蕪陋不工伏惟
目入幸甚

睠彼瀟江湄飛飛兩文禽生偶一何摯比翼復同心奇
毛賁五彩往來雲水深晴眠渚沙上雨息菰蒲陰朝夕
此遊衍情好無或侵豈知中道阻況迺異升沉雄歸五
雲裏照影天地潯音容踵殊愛不啻珍與琳羈雌獨留
滯戚戚悲故林驚風摧弱羽胡能諧遠尋本期金石固
倏忽如辰參何時遂良貽庶以釋煩襟莫學孤飛鳳遲

回戀遙岑

侍生宋恢頓首

鄉友楊公復之三世讀易學行俱優交好甚篤
茲子還鄉賦詩一首以別

萍水浮游我共君客窗風雨話離羣一經父子皆名世
四聖門庭久策勲踰躋甘爲明主棄倉皇忍與故人分
親闈若問天涯事道子朝朝望白雲

慈谿張楷

友生陳彥端頓首書奉

復之仁契先生坐下嚮在京師禮勤會數脗志同而心契所謂若飲醇醪不覺自醉者及至定適當孔道星使之往來者肩摩踵接僕僕送迎殆無虛日由此遂久關其書啓之禮疎慢取罪幸以明哲雅量無所銜之茲左繡衣至忽辱書承示別後體況清適且喜贊政蘭臺公外足以游心載籍兼審三令弟動履亦獲康勝殊慰企渴往年見長令子幼而騰異心已卜其遠器今其長也聞能漸進于學不輟其成就當有大過人者異日蓋不負所期也區區忝竊科第授此學職然以材薄力綿教

靡成效碌碌而無所裨耳乃承喻以衰拂之辭併致期望之意是待之厚而愛之過其何敢當此哉相見無期臨書悵惘惟祝倍萬保重不宣正統癸亥冬十有一月朔旦友生陳彥端頓首再拜奉書

林氏分書田記

林子當休沐之日諸子跽而言曰世之人多置良田爲子孫計獨大人以官爲家以祿爲田兒輩自能食時食大人俸餘今弱冠者垂髫者字育恩厚矣然綰郡章九載不殖厚產典文衡三次不放美莊第恐大人登耆老

之年致政南歸祿不入於家兒輩不知稼穡之艱難將何以仰食耶大人幸留意焉予拂然叱之汝輩真豚犬耳吾家世居官清白將何以遺汝乎不殖厚產吾不敢犯蕭何之律不放美莊吾不敢荒陸氏之莊且賢而多財則益其過吾豈敢玷清白以益汝輩之過乎旣退靜而思之兒言亦有理四顧環堵蕭然惟先君子積書一厨在翌辰乃召舉臯臮準申立於前曰吾爲汝輩置買田久矣以力尙弱弗能耕故未之分今當支分與汝耕矣有田一區在魯地凡十有二頃爲二百四十有二畦

乃吾家世業舉乎汝嫡長世業之田當汝耕爾祖嘗耕之初不甚獲歲之所入少至晚年始大獲一歲得米二百五十二石迨予承其業懶弗肯播耰故所獲減於先然一歲亦得米九十二石遇年若豐或有倍於是不可知然是田有嘉穀焉有狼莠焉閒有螟蟲蠹蟻害稼者焉苟不屬辭以治之比事以去之則大無麥禾矣汝當鋤削狼莠培植嘉穀使善惡判然明白且修德以去其能害稼者然尤須憂勤惕厲以祈六月之雨則不止有年將大有年矣乃取周地田以命臯曰是田計六十四

畝爲畦三百八十有四其壤始於乾州終於濟水自耒耜教耕之時已懇之矣治田必貴乎及時耕以時種以時耘以時俾其田絜淨而無草萊之穢則所獲之米精微而無蕘稗之雜矣三子輩性頗敏乃分田四大邱曰虞曰夏曰商曰周其土有九等所入之賦亦有九等焉田間有九河灌溉之輦乎是田廣而用力多汝必力穡乃有秋九河勿令其湮塞須疏通以致其遠然耕之之要貴乎得中自日中星鳥而東作興以至宵中星虛而西成畢中之一字不可失也吾嘗耕是田而未卒業汝

若弗力穡則人謂之曰厥父蓄厥子弗能播矧肯耰乎
汝必勉之惟準性浮薄故以田三百十一畝俾耕之是
田爲方不一自周南召南以至十三國地甚博也其疆
界則有正焉有不正焉汝當耕其正而治其不正所謂
思無邪是也然鹵莽而耕之則鹵莽而報之滅裂而耘
之則滅裂而報之必也一之日于耜二之日舉趾溫柔
以耕之敦厚以藝之于以戒汝之性焉屢遇豐年則芄
芄黍苗實堅實好我黍與與我稷翼翼千斯倉而萬斯
箱可期矣申也少然聳教小兒先要安詳恭敬故取田

三百畝於大戴小戴之家卑申耕之是田自王制一定
之後其五等分地甚均然其閒曲折之塍有三千耕之
貴乎恭儉能恭儉則歲之所收足乎用又貴乎莊敬必
如古人衣冠而耕蒸嘗之田又若耨於畎畝閒其妻饁
之相敬如賓之類是已申乎吾教汝耕之法曰毋不敬
旣分其田復進之曰世之人皆安土重遷雖有愚公之
術莫能移吾與汝輩之田可以卷舒而隨身且耕不用
犁而用舌耕耘不用鋤而用筆無沾體塗足之勞無水
耕火耨之苦力省於三農而所獲萬倍焉雖然魯西邑

名嘉祥其地產麟夫麟乃文明之祥今逢文明之世麟當出矣舉乃吾家千里駒汝有獲當貢于廷與之偕遊郊藪焉臯耕周田既有秋勿家食當觀國之光以利賓于王可也曩所耕之田伊尹嘗耕之矣汝能志伊尹之所志則迪簡于王廷有日矣準之田既熟必有臺萊之徵則當歌鹿鳴之什申之田既稔必至論定然後官之任官然後爵之汝輩當勉之哉章也最幼時亦坐膝上曰兒獨無田乎予笑曰汝力未勝耒耜俟長當以次分汝諸兄田然吾尙有私置之產一所其壤甚小四方不

過寸則吾自耕自耘者汝輩今日所不能與其力他日當與耕之是田之利非特汝輩食其報雖若子若孫尙亦食其報焉諸子請問其地久之乃顧曰厥田在靈臺之下丹府之中請問四至曰東至高門于公田西至三槐王氏田其北則以燕山竇氏心地爲準其南則以吳中范氏義莊爲鄰云客有聞者鼓掌而笑曰以五經爲田則近乎迂以方寸爲地則涉乎誕先生真迂誕之儒也予起而謝曰是誠迂誕矣獨不聞先賢云吾家無厚產經史是良田乎又曰但存方寸地留與子孫耕古人

迂且誕於前矣予特捧腹而效顰庸何傷客乃赧而退
諸子復告曰大人教兒輩耕固善矣如水旱饑饉何惟
先聖有云耕也餒在其中矣學也祿在其中矣人事既
盡天理自見夫何疑於是作分書田記俾舉輩各書其
一以置之田舍之壁時正統六年秋七月吉賜進士出
身奉直大夫刑部郎中潮陽林厚撰久不能造拜然亦
不承枉顧思仰何可言昨撰得分書田記錄去乞發一
笑亦望指教甚幸餘非面莫盡厚頓首

二月二十日辱友李黃頓首再拜

復之先生執事卽日春和計惟文侯體勝朝夕溫清外
與故舊相詠觴樂可知也僕德薄能鮮叨此厚祿常以
爲愧比者遷貳夏卿尤懼不勝其任先生有可以見教
者幸無吝也豚子聰失所依歸舊植頓落尤希遠賜教
言俾萬一有成詎敢忘所自邪因風草草奉伏不宣
再拜

送楊先生歸省序

予官翰林與尙書刑部郎中今山西大參林公厚交篤
正統辛酉春往公第獲面四明復之楊先生於文館接

其容煦乎春風之和也聆其言肅乎秋霜之厲也探其學浩乎淵源之溥也於是予亦遣子禎從之而往返彌篤語及令尊甫栖芸先生德業淑諸人也博登其門而穎異材成者不可勝計若今地官章公繪蓋其一也干以識夫先生之學有所自矣居夫何先生秋闈弗捷子以內艱去參商相望者幾年而予來京師先生敷對大廷登名仕版亞司馬姑蘇李公茂實聞先生之賢延聘于家授諸子經而林氏昆季泊予子禎復得就正門牆立寒雪挹春風者踰年而先生謁告歸覲嗟乎先生